

**(1) Seiko tichifanira kungoudza Mwari ega matambudziko edu?**

*VaHeberu 13:6*

Mapisarema anoti, “Vimba naJehova, uite zvakanaka; Gara panyika, ushingairire kutendeka.” Mapisarema 37:3. Zuva rimwe nerimwe rine mitoro yaro nezvinetso zvaro. Kune zvizhinji zvinoitika zvatisinganzwisisi uye patinosangana nevamwe hatifaniri kuvataurira zvinotiremera nemiedzo yedu. Patinogoverana navo zvinetswa zvedu zvinotitorera rugare rwepfungwa dzedu. Tiri kubvumidza kuti kutya kuuye nemhaka iyi zvinozotikonzera kurukutika mupfungwa nekufunganya kukuru. Zvadaro izvi zvinobva zvaita kuti vamwe vaone setisina Muponesi ane rudo netsitsi kwatiri akamirira kunzwa minamoto yedu yose uye kutibatsira munguva yatinonyanyisa kuda rubatsiro.

**(2) Mwari anozotisiya here kana tapinda pakamanikana?**

*VaHeberu 13:5*

Vamwe vanhu vanongogara vakazara nekutya uye matambudziko avanokwereta. Zuva rimwe nerimwe vakapoteredzwa nezviratidzo zverudo rwaMwari uye vachidya michero inobva muruoko rwaKe, asi vanosarudza kusaona zvikomborero izvi zvinongogara zviripo. Pfungwa dzavo dzinongogara dzichifunga pamusoro pezvakaipa zvavanofungidzira kuti zvingangovawira; kana kuti dzimwe nguva vanogona kuva nekumwe kuomerwa kunenge kuripo,kunyange kungave kudiki kunovapofumadza kuzvinhu zvizhinji zvavanogamuchira kubva kuna Mwari uye zvavanofanira kutenda pamusoro pazvo. Nguva dzakaoma idzi dzavanopindana nadzo dzinovashaisa kugadzikana. Kuremerwa kunobva madziri kunovabvisa pana Mwari panzvimbo yekuvaunza kwaAri iye chitubu cherubatsiro rwavo.

Zvinotibatsira here kuti tive nekusatenda kwakadai? Seiko tisingatendi uye tisingavimbi ? Jesu ishamwari yedu, uye denga rese rine hanya nezvinoitika kwatiri. Hatifaniri kubvumidza zvatisinganzwisisi uye zvinetso zvemazuva ese kutishusha nekutishaisa mufaro. Tikaita izvi hatifi takashaiwa chinotinetsa nekutikanganisa. Hatifaniri kugara pfungwa dzedu dzichigara pazvinhu zvinotikonzera kuremerwa nekushushikana sezvo izvi zvisingatibatsiri kana kutibudisa mumatambudziko edu.

**(3) Chii chatichaitirwa naMwari kana tikavimba naYe nekumutevera?**

*Zvirevo 3:5, 6*

Unogona kuva nematambudziko mubhizimisi rako, remangwana rako rigoratidza kuramba richingonyanyoipa uye uchityisidzirwa nekushaya pundutso. Kana izvi zvaitika haufaniri kukuhunika; kandira zvinetso zvako pamusoro paMwari urambe wakadzikama asi uchifara hako. Namatira njere dzekufambisa mabasa ako zvinenjere kuti urege kurasikirwa nekupinda munjodzi. Ita zvese zvaunogona kuti uwane pundutso. Jesu akavimbisa kutibatsira, asi kwete tisina kuita zvole zvatinogona. Kana wanga wakavimba naMwari ukaita zvese zvaunogona, gamuchira zvinouya kana kuti mhinduro yacho nemufaro.



**(4) Kukurudzirai kwatinopihwa naMwari apo tinosangana nezvinetso?**

*Johane 16:33*

Hachisi chidiso chaMwari kuti vanhu vaKe varemerwe nezvinetso zverino pasi asi Mwari wedu haatinyengedzi. Haati kwatiri, “ Musatya; hakuna matambudziko munzira yenyu.” Anoziva kuti zvinetso nematambudziko zviriko, uye anotitaurira chokwadi pamusoro pazvo. Hatauri kuti vanhu vake vanofanira kubviswa munyika inechitema nehuipi, asi anovanongedzera kuutiziro husingafi hwakakundikana.

**(5) Ivimbisoi yatinogona kusendama pairi pamusoro pezvidiso zvedu zvezuva nezuva?**

*Mateo 6:33*

MuMharidzo yaKe paGomo muna Mateo 5, Kristu akadzidzisa vadzidzi vaKe zvidzidzo zvinokosha pamusoro pekuvimba naMwari. Zvidzidzo izvi zvakapihwa kuti zvikurudzire vana vaMwari munguva dzose, uye zvinouya kwatiri munguva yedu zvakazara nekuraira nekunyaradza. Muponesi akanongedzera vateveri vaKe kushiri dzedenga, dzinoimba nziyo dzekurumbidza dzisina chadzinofunganya, “hadzidyari, uye hadzikohwi.” Asi Baba vakuru vanodzipa zvadzinoshaiwa. Muponesi anobvunza, “Imi hamukoshi kudzipfuura here?” Iye Mupi mukuru wemunhu nemhuka anozarura ruoko rwaKe achipa nekuriritira zvole zvinodikanwa nezvisikwa zvaKe. Anotoonawo neshiri dzedenga asi haadonhedzeri zvekudya mumiromo yadzo, asi Anoita kuti zvadzinoda zvinepo. Dzinofanira kuunganidza kudya kwaAnenge adzimwaira. Dzinofanira kugadzira zvekuvakisa matendere adzo nekupa kudya kumanyana (mabwipwi) adzo. Ichokwadi kuti, “Baba venyu vekudenga vanodzipa zvekudya zvadzo” uye kuti “ imi hamukoshi kudzipfuura here?” Ko imi, sevanhu vakangwara vanonamata pamweya hamunyanyokoshi

here kupfuura shiri dzedenga? Ko iye Muvambi wekuvapo kwedu, Muchengetedzi weupenyu hwedu, iYe akatiumba nemufananidzo waKe chaiwo, haangatipi zvole zvatinoshaiwa here kana tikavimba naYe?

**(6) Kristu anoda kuti tifungisise pamusoro pei, sesimbiso yehanya nerudo rwaKe kwatiri?**

*Mateo 6:28-30*

Kristu akanongedzera vadzidzi vaKe kumaruva ebundo anokura muupfumi uye achipenya murunako rwaakapihwa naBaba senzira yekuratidza rudo rwaKe kuvanhu. Akati, “ Fungai maruva ebundo, kumera kwavo.” Maruva aya anokura zviri nyore uye akazara nerunako, akashongedzwa kupfuura mbiri yaSoromoni. Mbatya dzakagadzirwa nehunyanzvi hwepamusorosoro hadzigoni kuenzaniswa nemaruva ekusika kwaMwari anobwinya achizvikurira munyasha dzaKe. Kana Mwari, Mugadziri Mutsvene wezviyevewa achipa kuruvawo zvaro rinofa nezuva rimwe chete udavado nemavara akasiyanasiyana, ihanya yakakura zvakadii yaangaitira vakasikwa mumufananidzo waKe. Muchidzidzo ichi Jesu ari kutuka mwoyo usina kutenda wakazara nekutya uye usina chokwadi wakazara nekukahadzika. Ishe anoda kuti vanakomana nevanasikana vaKe vafare, vave nerugare, uye vateerere, saka akatipa vimbiso iyi inoshamisa.

**(7) Kristu achapei kune avo vanomushandira?**

*Johane 14:27*

Kana munhu akaedza pese paanogona kunotsvaga rufaro akazadzwa nechindini, achawana zvisingagutsi, zvinoshanduka uye zvinongopfuura. Akatsvaga mufaro nenzira iyi, mwoyo wake uchazadzwa nekusuwa uye nekunzwa ari ega Kune rumwe rutivi, kune mufaro, kusununguka nerugare mukushandira Mwari. MuKristu haasiiwi kuti afambe munzira dzisingazikanwi; haasiiwi aine kuzvidya mwoyo kusina basa, nekukundikana. Kunyange tisina mafaro eupenyu huno, tinogona kutarisa mberi kuupenyu hunouya nemufaro.

**(8) Mukuvimba zvakazara muna Kristu kunyaradzwai kwatinowana?**

*Mateo 28:20*

Kunyange mupasi rino Makristu anogona kuve nerufaro runobva pakuva pedyo naKristu. Vanogona kuva nechiedza cherudo rwaKe, nekunyaradzwa kunobva pakuziva kuti aripo nguva dzose. Nhanho imwe neimwe yeupenyu inogona kutiswededza pedyo naJesu, inogonawo zve kutisiya tave pedyo pedyo nemusha wakakomborerwa werunyararo. Saka ngatiregei kurasa vimbo yedu, asi tive nekutenda kwakatosimba. “Jehova wakatibatsira kusvika pano,” uye Achatibatsira kusvikira kumagumo. 1 Samueri 7:12.

**(9) Seiko zvikomborero zvatakapihwa naMwari zvichifanira kugara zviri zvitsva mupfungwa dzedu?**

---

---

---

*Deuteronomio 4:9*

Ngatitarisei kushongwe dzine simba dzatakapihwa naMwari kutirangaridza zvaakatiitira kuti atinyaradze nekutiponesa kubva kuruoko rwemuparadzi. Unyoro hwenyasha dzaMwari hwatakaratidzwa ngahugare huri hutsva mundangariro dzedu: misodzi yaakapukuta, marwadzo aakabvisa, kutya kwaakatora; zvataida zvaakatipa, uye zvikomborero zvaakatipa. Kurangarira zvose izvi kunotipa simba rezvatichatarisana nazvo murwendo rwese ruri mberi kwedu.

**(10) Tinovimbiswei apo tinosangana nezvinetso uye matambudziko atinofanira kutakura?**

---

---

---

*1 Petro 5:10*

---

---

---

*Jobo 23:10*

Tinogona kutarisa zvinetso zvapakpfuura uye zviri kuuya toti, “Jehova wakatibatsira kusvika pano.” “Nesimba rako richaenzana nemazuva ako.” Deuteronomio 33:25. Muedzo hauzofi wakava mukuru kudarika simba rinopiwa kwatiri kuti tiutakure. Saka ngatiitei basa redu pese patinoriwana uye tichitenda kuti zvisinei nemuedzo ungauya, Mwari achapa simba rinodikanwa.

**(11) Tingawane mufaro mukuziva kuti kudini?**

---

---

---

---

---

---

**(12) Mazwi rudzii anoshamisa atingatarisira kunzwa sevakuriri?**

---

---

---

*Mateo 25:34*

Kana nguva yakwana masuwo edenga achazarurwa kuti vana vaMwari vapinde, uye kubva pamuromo waMambo wokubwinya chikomborero chevhesi riri pamusoro chichawira munzeve dzavo semumhanzi unodakadza. Nenguva iyo avo vakaponeswa vachagamuchirwa kumusha uyo Jesu akaenda kunovagadzirira. Vanenge vasisiri pakati pevakaipa vepasi rino vanoreva nhema, vanamati vezvifananidzo,vasina kuchena mupfungwa uye vasingatendi. Vanenge vava pamwechete neavo vakakunda Satani uye

vakaumba zvimiro zvakaperera kuburikidza nenyasha dzaMwari. Kurerekera kwese kuchitema uye kakusakwana kese kaivanetsa pano kakabviswa neropa raJesu. Kuperera nekubwinya kwembiri yaKe kunopfuura kupenya kwezuva kunopiwa kwavari. Runako rwekukwana urwo ruri kuperera kwechimiro chaKe runopenya nemukati mavo zvinopfuura kubwinya kwekunze. Havana chavangapomerwa pamberi pechigaro chikuru chichena, vava vagovani mukuremekedzwa nezvikomborero zvengirozi.

**(13) Apo tatarisana nehupenyu husingaperi mubvunzoi mukuru watinofanira kuzvibvunza?**

---

---

---

*Mateo 16:26*

Takatarisana nenhaka yokubwinya inogona kuva yedu, pane chimwe here mupasi rino chinokosha zvakadaro zvekuti tirasikirwe nemweya yedu? Tingave varombo, asi tine upfumi nekuremekedzwa kwatisingagoni kupihwa nenyika. Mweya wakadzikinurwa ukachenurwa kubva kuchitema, ukapiwa mukushandira Mwari nesimba rawo rose, unokosha zvikuru. Pane rufaro mudenga pamberi paMwari nevatumwa vaKe vatsvene pamusoro pemweya mumwe wakadzikinurwa, rufaro runoratidzwa munziyo dzekukurira kutsvene.

*Ndinopa mwoyo wangu wose kuna Jesu nekugamuchira nyasha dzaKe dzinoshamisa dzaanondipa. Ndinogamuchira ruremekedzo rwekutakura zita rinonzi “Mukristu.”*

**Tenderedza: Hongu Kwete Handisati ndasarudza**

*Chidiso changu kuti ndive Mukristu akasununguka uye anoratidza vamwe rufaro, runyararo uye kufaranuka kunobva mukugara maAri.*

**Tenderedza: Hongu Kwete Handisati ndasarudza**

*Ndinotenda Mwari nekundiratidza muShoko raKe matsiko andinofanira kutora mukuuya kwaAri. Pandapedza zvidzidzo izvi ndanzwa Mweya Mutsvene Achinditungamirira mukufamba pedyo naKristu.*

**Tenderedza: Hongu Kwete Handisati ndasarudza**

*Ndine chidiso chekuwana zvimwe zvidzidzo zveBhaibheri zviripo. Ndinoda kunzwisisa zviri nani zano raMwari nehupenyu hwangu.*

**Tenderedza: Hongu Kwete Handisati ndasarudza**

(C) Merlin Beerman - [www.revelationpublications.com](http://www.revelationpublications.com)  
Illustrations (C) Goodsalt - [www.goodsalt.com](http://www.goodsalt.com)  
These materials may be photocopied and shared but not altered or sold.

Printed in USA by Light Bearer’s Ministry - [www.lbm.org](http://www.lbm.org)

# Matsiko Kuna Kristu



## Rufaro Muna Jesu - 2